

四庫全書

集部

欽定四庫全書

至正集卷四十七

元 許有壬 撰

碑志

勅賜故中憲大夫嶺北等處行中書省左右司郎  
中贈集賢直學士亞中大夫輕車都尉追封真定  
郡侯蘇公神道碑銘

中憲大夫嶺北等處行中書省左右司郎中蘇志道既

卒之十七年為至元二年丙子歲制贈集賢直學士亞中大夫輕車都尉追封真定郡侯明年正月丁未制詔臣有壬銘其碑陝西諸道行御史臺中丞臣祖常為書江南諸道行御史臺侍御史臣起巖篆其額從臺臣請也蓋志道子天爵為御史臺都事臺臣熟其賢覈其父之實而臣有壬待罪中書天爵右司都事是亦熟其子而知其父者皇帝孝治天下臺臣職風教勵臣子是有繫焉臣有壬其敢以蕪陋辭乃本其狀而筆之曰公字

子寧真定人曾大父元老金亡不應徵辟年九十卒妣  
孫氏大父誠善治生妣畢氏父榮祖累贈中順大夫禮  
部侍郎上騎都尉真定郡伯妣吳氏追封真定郡君公年  
十四居禮部喪廬墓側又奉母十年事葬以禮平陽姚  
天福守真定舉府吏方早從決獄而雨辨盜馬成獄之  
寃辟河東憲吏入為察吏行和林楊州良家子訴直賣  
三易主御史逆詐斥去公曰詐自抵罪訊之果實民而  
復其里轉戶部令史浙西豪民以佛為標榜相煽為姦

衆至數萬號白雲宗握印章以總其屬公私病之詔禮部侍郎高昉治其獄以公從京師五往返始竣事沒貲產鉅萬歸良家子女出註誤數百人擢掾樞密選籍積滯悉舉而行從樞密臣行邊歸掾中書尚書省立勢威中書掾爭趨之公獨安焉尚書省尋罷乃釐其濫銓起家承直郎中書省檢校官陳便益正愆繆黜姦賊吏覈濫出金穀若干六曹吏為悚畏御史咸薦才宜風紀有尼者或勸一往曰謁得御史尚何以御史為哉改刑部

主事刪條格便比傳盜有蔓及無辜主者欲盡速力止之盜內府金獄未具時相亟欲殺之公曰獄未具殺之尚書省所以敗也時相怒會樞密院奏為斷事官經歷而解軍士護視金銀器又遣他往比還失之將論以盜公曰此失耳俾償而免闕中之警和林失守和林百年來生殖殷富埒內地至是並塞之民奔潰四去天復大雪至丈餘畜僵死且盡人並走和林乞食時倉儲僅五萬石米八十萬錢强者相食弱者相枕籍死優秩除吏

率難其行公毅然請往擢嶺北行省左右司郎中既至  
愀然曰天下之事復有急於賑饑者乎白其長發廩賑  
之人大者三斗小六之一又贊省官為文請於朝曰和林  
根本之地今倉儲無幾餓莩山積賑饑人則失軍餉專  
軍餉則坐視饑死事不兩立揆其緩急已便益賑之開  
平沙靜差近請高估募民致粟次募四方以先後至為  
差厚酌其直民必爭赴而邊儲可實朝廷從之制致粟  
和林者以三月至石與五十萬錢四月至減十之一五

月至又減其一至即給直於是民果爭赴而邊儲之實如舊為考覈法使繼者不能為姦諸王汎索持法一不與王怒使人譙公對曰府藏軍興也有司守之非軍事誠不敢與皇子安王以衣褒之吳王予名馬受而歸其直時酒禁多犯朝議謂法輕使然更奏論死令下三日得趙仲良等五人酒有司論以死公曰酒豈三日可成犯在令前當用前法設當坐亦宜復讞奏報乃決豈得擅哉上其事法司議當用前法五人得不死即孔子廟



延士講經史率僚屬往聽夜分乃休廟故丞相順德忠獻王建未就而薨捐俸成之邊民列公政績上之御史而同列多異遂辭歸至京師卒年甫六十延祐七年二月壬戌也三月乙酉葬真定縣北新市鄉新城原先塋配劉氏累封真定郡夫人後四月卒子男五人其四天爵也國子員釋褐薊州判官歷館閣至右司遷刑部郎中遂佐臺幕今禮部侍郎官太中大夫女三人孫男一人昌文女一人幼公為吏二十載始得官官四轉

皆佐幕而見諸事業若此是知士之生世官不貴大而  
貴其行事不務多而務其急故下僚有浮於上官而一  
事有勝於百千者君子之觀仁必於其大者焉公自弱  
冠諸父析財不能止獨取薄田遺書其仕也不肯私謁  
以求為御史至於和林之贊荒政則茂績也嘗觀古人  
列傳或載一事或一二事足以見其人大節況著見若  
是者乎蘇氏之先自行唐而樂城樂城而真定閔之者  
翕故發之者闢導之者遠故流之者長至公啓矣而猶

未暢又一傳得天爵階三品始疏侯封而馳及大父焉  
天爵仕日崇疏封未已也古之人臣服寵嘉而銘器物  
者不惟章君之賜示不敢忘也天爵推恩其親恩至渥  
矣而又賜銘墓碑紀休永久其不敢忘而移孝為忠者  
其益勗哉銘曰

猗嗟子寧父孰究其諤片言折獄若不能語勁氣拔距  
若弗克舉不鄙郡史從讞則兩恢恢游及匪越其俎姦  
人借佛蠱我士女禮部擇人于殖于去金山稱海百萬

其旅不資贊畫曷張我武崑岡火炎委局趨附曾不踰  
時我奪我子廷尉持平文智敢舞天子有法相國何怒  
伊誰教言私謁進取失將千金得未一羽睞茲和林實  
我天府百年生殖馳馬布野天胡怒之長驅貔虎蹂我  
旄倪蕩我牧圉天雪縷縷饑食無所流民如水積骸如  
堵拜郎給傳往佐其撫藩臣孔賢有善斯取總總黃臆  
僵卧待哺有如赤子遽得父母馳牛輓輸奔走高估庾  
廩充溢國本以固方期用世一夕今古公則不死有子

仕撫天子有詔刻石表墓於永其垂新城之下

勅賜故光祿大夫大司徒釋源宗主洪公碑銘

至正七年八月戊寅皇帝御慈仁殿集賢大學士臣五十四言故光祿大夫大司徒沙門法洪逮事累朝其德業有足稱者願刻石以示永久有旨命御史中丞臣有壬製文且為書翰林學士承旨臣起巖篆其額臣有壬於洪公非有支許之分而其為學又異宜不足以知之者然天子有命其敢辭謹按其事狀擇而書之公姓劉

氏隴西鞏昌成州人生有異稟九歲入鄉校日受書累  
千言輒成誦不忘年十二窺釋氏內外典有契遂辭親  
禮州之興化寺武公總攝而祝髮焉又八年從金仙律  
師受具戒乃發足游方謁少林法主參決心要即廓然  
自得時真覺國師松堂公居大白馬寺公往依之松堂  
沙門上輩負海內之望與語大見器異留侍左右為之  
發揚宗旨周密微妙遂能窮極法源卒嗣其業承記傳  
衣之日靈鶴翔其庭松堂喜曰是必能大吾教矣大德

中總統司請為釋源白馬寺長講號大德法主武宗皇帝在潛邸聞其名特命住持秦州大聖壽寺至大改元復命即秦州開演長講勅有司月給衣糧焉仁宗皇帝臨御之明年宣政臣奏旨起公住持白馬寺未幾賜號釋源宗主驛召至京師沙囉迦八哈失首見推重請主西山龍泉寺尋奉勅翻譯諸菩薩經撰大元帝師帕克斯巴文廟碑文成奏御嘉賚甚厚遂詔公住持新建大永福寺蒞事之日三宮賜白金中宮復製紅衣以衣之英

宗皇帝時居東宮已虛佇信嚮數嘗引見既即位即授  
公榮祿大夫司徒已而進階光祿加大司徒刻銀為印  
食一品祿承制總選名僧校讐三藏書領江淮官講凡  
三十所於是貴幸莫比矣會壽安山大昭孝寺成詔以  
公主之大都弘正棲禪上都弘正等寺皆隸焉大昭孝  
寺者英宗之為太子嘗至其處喜其山水明秀左右或  
言此山本梵刹也後為道士有耳目屬意焉至是以鈔  
二萬錠賜道士使別營構因觀基煉石鑿闕大起佛宇功



德無量欲資以慰薦祖宗在天之靈旨意甚銳惟公具  
大善知識願力堅固簡在宸衷其膺是選亦可謂非常  
之遇矣於是車駕臨幸置酒流盃池上丞相東平王及  
公侍天顏甚懌顧左右若曰朕有賢相又得此奇人至  
可樂也因手簪花其帽諭所以畀付之意故事官寺方  
大每歲望幸主者不敢居特勅大臣設宴命公入處以  
寵異之他日丞相就公問所以為治之道公舉儒者經  
權之論以對丞相喜曰吾今乃知公有濟世才非徒空

言而已泰定初或謀動搖壽安者微公慧力足以攝之  
則將不得免焉至正二年今上皇帝御龍舟游幸玉泉  
諸山至壽安以公先朝耆舊特優禮之初天厯中嘗賜  
鈔三百萬錠以其二買田飯僧以其一視規息為國家  
修建佛事其後官府稍見侵奪至是丞相托克托公以公  
故奏請復之比車駕還宮復遣使賜上尊為公壽其被  
遇累朝光顯如此四年春三月六日卒壽七十三為僧  
凡六十有一年大臣以聞天子憫悼勅有司致賻備儀

衛祖送如禮既闌維門人三分其骨瘞壽安白馬及陝西之興教寺而建塔焉公度弟子十餘人得其道者曰允中為昭孝法主與公同日歿嗣法者以百數曰德政主白馬曰道傳曰慧潤主永福壽安則又所謂傑然者也公為人執行嚴峻識度開朗其於禪乘律義既究極無疑而於孔老百氏之書又能鉤引貫穿從橫出入乎其間故其平生論議多涉獵經史娓娓可觀有雲麓集十卷行於世云臣聞西方之教以空洞為實以有為為

妄儒者謂其有體而無用異於聖賢之道也惟大司徒始能以真如三昧啟迪其徒空術既顯及其樹大法幢鳴大法鼓又能以才器文辨見知聖代恩數優渥雖宋慧林唐不空被遇之盛未有能過之者殆所謂為而未始有為無為而無所不為者歟故觀其所與東平問答又皆平易精實體用兼備其有得於聖賢之學者未可以浮屠氏之說器之也謹叙而銘之其辭曰

出世之士一切不作流於空愚無有知覺用世之士一

切有為流於功利靡所底歸爰有大智見道立卓非律  
非禪無適無莫白業之積始自秦中雷音振揚達乎九  
重義衣來朝當宁前席王后君公膜拜接舄爵以上卿  
為帝外臣陰翊乾運密贊皇仁動言事為有典有則著  
為文章載在金石壽安之山龍宮翼嚴人天畢來四聖  
具瞻樹立門庭廣大堅固孰為為之以我佛故功名富  
貴文字語言何有於我得魚忘筌化緣既周委席而去  
生也則榮歿有餘譽歿有餘譽天子念之臬臣屬辭以

永其詒

有元扎拉爾氏三世功臣碑銘

昭武大將軍河南淮北蒙古軍都萬戶察罕特穆爾言  
太祖聖武皇帝之肇闢天地也先臣和克齊率所部為  
前驅四征不庭與有駿功實察罕特穆爾之始祖也贊  
金之役高祖舒爾罕大戰野狐嶺流矢中額卒賜錦綺  
萬馬四百匹魯大父特們岱嗣將世部征喀爾執訊取  
大珠以獻平西夏推首功太宗皇帝命行都行省事總

烏魯等五部族將平金賜食邑二千戶憲宗征蜀日扈  
帳殿出戰必捷并晉懷洛之民懷不殺恩皆立祠以祀  
而大父鄂囉齊受知世皇既襲世官又總四萬戶戰襄  
樊攻沙洋下郢復破陽羅渡江圍鄂招降其守從大兵  
鼓行下泂江江東浙西諸郡獨松關脩嚴而守固陰設  
伏陽樹熾山上單騎突前伏發守兵驚潰追奔百餘里  
俘馘無算旣入杭分下浙閩諸郡之未下者追迫二偽  
孽沒於海宣慰湖北山南二道拜叅預左右丞平章政

事行省江浙湖廣江西南二行樞密院湖北新民危疑  
逃匿山澤約束勞來俄皆復業軍士俘獲生口多逃歸  
有司括男女千餘人欲隸之官謂同僚曰新民幸依其  
父母隸之官是重被兵也籍而復宋版之舊平劇盜周  
龍張虎湖南始寧佐征交趾賊懼避匿乃梗我歸路轉  
戰全師而出驛召面籌者三慰勞溫至錫賚優渥復平  
章政事行省江西費贈金紫光祿大夫大司徒上柱國  
江西行省平章政事追封鄭國公諡忠宣上命大父之



征交趾也即命先人托音布哈襲世官從征納延有功以行省左丞行世官都萬戶事仁皇淵潛覃懷擁護有力拜湖廣行省平章政事進左丞相薨贈銀青榮祿大夫上柱國湖廣行省左丞相追封鄭國公謚宣簡若兄布達拉濟則又攻文事以佐其武精騎射而濟以勇右丞兩省咸以能稱鎮虎北口單騎破敵號著巴圖賜有金帶二行樞密院以遏中夏之震驚發私廩以振兵役人民之野栖無食者院革仍都萬戶邏紫荆關薨於行

察罕特穆爾襲兄職不勝是懼敢妄徼請以勤有司第  
念一門六葉服勞王家若曾大父而上當天造之初官  
制簡古若帥若行省各正天功惟是大父丁世皇混一  
之會父若兄仕列聖熙洽之朝雖存沒爵贈已極隆赫  
而所謂功臣之號尚稽寵錫敢援故事以請下有司議  
曰宜乃集禮曹集賢翰林太常擬贈忠宣推忠開武協  
運佐治功臣宣簡守忠翊正濟美演德功臣封謚皆如  
故右丞保忠經武致德宣惠功臣江西行省右丞上護

軍追封夷山郡公謚榮襄制可後至元庚辰命下至正  
丙戌九月昭武扈從歸過安陽諭有壬曰伊水之東先  
塋在焉世勲已銘矣今也加號三世而銘未有託君賜  
不章且無以最後敢以屬子有壬惟周禮司勲其等有  
六皆銘於太常祭於大烝而六等之列戰功曰多昭武  
之三世是已銘太常祭大烝在古不靳況所謂號乎古  
者諸侯薨天子論行以賜謚謚以尊名古之制也功臣  
之號李唐昉有奉天定難之稱趙宋因之始加四字或

六字有至十餘字二十字者皆施之於生以為結銜雖制非隆古而勸忠勵節有取焉我元儀禮制度尤不輕畀至治著令立廟有大節功勲在王室者許加焉皆施之於沒以冠易名天歷初二貴臣始有生加而又有賜大小金符刻其字於上朝會大宴則佩之蓋異數也惟扎拉爾氏大賢世出殊勲碩畫與國基命蓋國之世臣也且世臣孟子所重而公羊譏之何哉譏其以世不以賢也苟得賢如扎拉爾氏諸孫尚何譏乎寵恩茂典

不例恒品且當畀之沉見之著令者乎昭武之三世加  
號禮亦宜哉昔有河山白馬之誓盟未寒侯者百四十  
三人已無子遺而我之功臣尊寵付託始終不替泝其  
源而導其流溉其根而遂其實相與保富貴於無窮有  
壬於是有以見我元崇德報功天覆地載之德軼炎劉  
而匹隆古矣雖然席勲業之舊著閎闊之英者亦不可  
恃天地之德而不自為悠久之念也夫為人孫若子弟  
孝敬而已移而為忠臣道斯盡孝敬本立則世臣者雖

百世可引也昭武於祖若父兄既克顯之孝敬備矣後  
昭武者其聿修無忝銘曰

國重世臣其重以賢汴而高曾公而曾玄族有逖邇貴  
胄則一攀鱗翕從橫戈四出瀚海之西昧谷之東靡遠  
弗至靡戰弗從繼體總戎挺額受矢罔俾萬春專美唐  
史倬彼前烈克承以似民死而生有嚴廟祀桓桓忠宣  
造攻襄樊四萬其師虎節龍章長江滔滔一葦可杭遇  
無完壁迎有簞食斬關獨松追播海涘新民按堵全師

飲至宣簡襲部鳬藻允諧平叛遼東捧日覃懷惟喬有  
梓實邦之楨塞垣摧敵突騎衡行疏郡夷山錫嘉發榮  
榮裏有弟忠宣有孫我先不顯曷裕後昆名非眩實於  
以勸忠三世沛澤八字表功伊水悠悠象彼世澤伊闕  
如礪我功不泐

至正集卷四十七

欽定四庫全書

集部

至正集卷

四十八至  
五十二

詳校官編修<sub>臣</sub>錢樾

侍讀<sub>臣</sub>孫球覆勘

總校官降調編修<sub>臣</sub>倉聖脉

校對官中書<sub>臣</sub>潘曾起

謄錄監生<sub>臣</sub>王天侶



欽定四庫全書

至正集卷四十八

元 許有壬 撰

碑志

劉平章神道碑

功臣國有史家有傳墓碑有銘史則在公惟傳若銘志  
必是重托必其可脩名偉績用底不泯焉有壬在少時  
知湖廣平章青社劉公已習晚識其子四川平章而不

知公墓碑之未銘也四川薨其弟為湖廣行省叅知政事始奉家傳請銘有壬以公名績如彼而託非其可辭叅政請益切辭既不獲且夙嘗不揆不可而喜銘偉人乃覈其傳而筆之公諱國傑字國寶系出女真烏庫哩氏歸我更姓劉氏曾祖諱延心金樞密使妣富察氏祖諱鎬金蔡息陳頴路都統妣圖克坦氏考諱德寧益都路軍民達魯噶齊青難治且新造疑畏為設條約郡以治聞進龍虎衛上將軍卒官妣鄂囉氏子四人國秀國材

皆居遼東國華早卒公其季也幼嬉即為行陣坐作狀  
工騎射從攻連海有功擢隊長至元己巳天兵南下為  
新軍千戶宋保障襄樊分屯萬山堡敵偵不備突至堡  
兵才數百公結陣直趨衆因乘之斬首四千餘級主帥  
嘉之賞白金百兩攝萬戶略地荆峽深入轉戰俘生口  
萬餘賞白金如初數復戰城下多俘斬賞白金如初之  
半土城為藩蔽最堅作雲梯先登裹創力戰拔之錫金  
符階武畧將軍敵圍久食盡張順等潛運以入公勒戰

艦邀其歸路鏖戰五十里禽順樊城夾漢水潛杙其中  
盡拔出之毀其南柵湮其隍坎墉以登拔之俄拔樊城  
戰尤力呂文煥降甲戌奉詔入覲賜白金百兩錦袍弓  
矢鞍勒進武德將軍佩金虎符管軍總管我師次郢宋  
壁黃家原堡公以三百人徑奪之郢將趙文義襲我反  
擊走之文義敗死斬首七百餘級進武節將軍沙洋新  
城皆阨塞地先以五十艘退沙洋守兵進攻新城三晝  
夜乃拔賞白金二百五十兩我師自陽羅堡畢渡孫虎

臣拒於丁家洲公以選鋒當前其衆自潰逐北至蕪湖  
始擢萬戶是後累功賞白金至千兩維揚之役詔壁揚  
子橋張都統率萬人夜寇備嚴莫能入遲明追擊禽之  
賜名巴圖國語驍勇稱也丙子維揚守帥李庭芝遁公  
帥所部追至泰州斬首千餘級獲之江淮平進懷遠  
大將軍入覲賜白金千兩錦袍弓矢鞍勒授僉書四川  
行樞密院事將行止有警制命公曰征者不力以其族  
屬懷顧望爾卿號陳力朕視卿如子當如朕躬行也行而

敵已遁遷鎮國上將軍漢軍都元帥賜錦袍玉帶弓矢  
鞍轡褚幣中統五千緡俾戍青社戊寅徵詣上京統侍  
衛軍萬人北征慰託甚至公頓首曰臣粗習兵事惟血  
衷可以報國有功諸將力也萬一蹉跌臣自當之上為  
嗟嘆師次益圖大雪環車為柵穴地與士卒同卧起托克  
托呼犯塞輕騎襲破之樞密同知伯勒默色分道追敵  
敵已潰慮糧盡遇伏委輜重南奔為收其散亡而歸戊  
青海開屯田進輔國上將軍壬午召赴京師上欲復討

日本公語稱旨授征東行省左丞練士治械於維揚閩盜黃華嘯衆十萬江浙為震詔公以征東士馬會捕直趨赤崖砦斬黃華繫其老弱購其餘黨同官語公不盡誅無以懲公曰黃華就戮誑誤已多况脅從乎彼方仰我生育忍更殺之但致期使自新足矣衆果自降初朝議恐賊不制發蒙古軍三萬濟討所過蕩然移文止之閩民德焉征東省罷改僉樞江淮又改四川俄復江淮征東省復仍為左丞詣闕上方畧還維揚征東省又罷

仍僉樞江淮東南賊未殄有詔一以委公改湖廣行省  
左丞湖南李萬一怙險莫制置郵為絕乘銳平之丁亥  
駐桂林治交趾軍興四會獠出剽急擣其柵禽之詹一  
仔等寇衡永寶武張甚徵諸路兵慮饋輸不繼作屯於  
衡曰清化永曰烏府武岡曰白倉未半歲皆自歸江西  
盜逾境會江西行院投蕭獠於陽山平懷集逋寇已丑  
廣東盜出沒搯其亢夷其柵焚其積聚殲其魁閭曾廖  
蕭嚴鑿山刊路搜抉殆盡樞臣請它官符上曰卿等忘



劉二巴圖耶對曰劉已授上曰前以酬功今授俾延於  
世遣使持符即軍中佩之陳獠犯道連境遮擊之殺賊  
過半江西盜復逾境犯郴窮追狝之土人訟弊遵賊為  
惡得其狀皆戮之龍泉獠圍禾源下令往捕或謂賊未  
逾境不當行公曰休戚一體彼此何別且賊不意吾越  
境討之乘其不備破之必矣簡閱夜赴麾騎兵進步從  
之賊大敗奪所掠子女二百人還其家禾源窘已數日  
軍忽至民以為神皆焚香泣拜俘賊言南安鍾獠將出

剽分兵猝至其巢獠衆錯愕自蹈藉奔潰萬戶劉兵至賊已平矣出橐中白金以犒將士旋車桂東獠破邛縣大肆焚掠走壁龍泉分兵三路公由中徒步援蘿磴險抵其巢柵勦之擇郵要地置軍以戍永賊李末子七千殺其監郡呼圖公知賊素易官軍示以閒暇扼其出路俾埜無所掠逃無所之乃與降獠分道而進禽而斬之辛卯遷資德大夫湖廣行尚書省右丞廣東獠復叛聞公行皆自破散復湖廣行院公為副樞治盜春陵盜又

道監郡貪虐下之理死郡人稱快紀之碑初公屢有功  
行省權臣抑不以聞至是行院始叙上之賜玉帶一白  
金五百兩時順德王達爾罕以碩德重望行湖廣平章  
與公相得嘗謂公曰世間文字惟漢人之學為最惜我  
不知公曰以公之聰明任賢使能即是讀書使子孫留  
意經史即公自讀也王嘉納焉癸巳秋入覲上悅其來  
曰湖廣地重卿宣力多漢人每以老避事國人則不然  
目明身健即為不老卿亦未老將委卿大事卿還避否

公對曰臣死而後已不敢避也上曰成哇既得復失卿  
盍為朕行對曰成哇指末物交趾掌中物也臣願為陛  
下取之上曰此事猶癢在心豈諸人爬搔所及卿言乃  
深合我意識典軍十萬公對曰十萬大費只須萬人上  
曰十萬多一萬少以番漢五萬付卿公請近臣為監上  
初不許以示專任請不已乃令自擇時親王伊奇爾岱  
在側公以請許之授榮祿大夫安南行省平章政事賜  
錦衣一襲期諸軍會桂林甲午春朝廷有大故師遂寢

成宗皇帝即位命公為湖廣行院副樞分院衡陽以遏  
嶺管江西賊犯攸州公擣大溪山四向捕斬賊為屏息  
施容羣蠻畔辰澧民不得耕畜地蓋矜獠所巢雜以猫  
猯數郡騷動公以土酋攻之有功者仍出橐中銀幣為  
賞應時破滅先是蠻恃山谷而吾士素弱公乃先涉危  
徑刊木闢路師行千里不撓於險渠魁田知州孟千戶  
撒大王之屬皆就戮元貞乙未行院罷公為湖廣行省  
平章五溪郡縣唐宋以土丁捍蔽廢久賊遂肆公復之

民賴以安又以道郴衡桂茶陵接諸獠擇要地樹砦柵  
廿八以扼之入覲賜玉帶錦衣弓矢鞍勒御史臺奏出  
褚幣四萬緡以酬私犒之費上思州知州黃聖許叛命  
公討之身先士卒突其陣賊殊死鬪張兩翼馳之賊敗  
逃象山山界交趾多巨象獐獸林菁蒙密公料地樹柵  
亘數百里諸將分道入禽殺殆盡聖許逃安南撫其脅  
從徙慶遠郡不能自食之民耕其隙地為五屯因以為  
防奏上報可召入賜錦袍珍帽弓矢鞍勒上廐馬自是

威警南土矣大德辛丑召至上京灤水泛溢公董疏導  
之役和林有警命公出師將行會鬼國酋折節暨獠宋  
隆濟叛初右丞劉深言西南夷有所謂八百媳婦者沃  
壤多產可取朝廷信其言命之出師湖南北轉輸十不  
致一民為竭產役夫死者相枕藉折節乃渠帥阿那妻  
健黥而能兵師過其境不堪蹂躪遂叛遮深兵圍貴州  
朝廷患之亟命公往蒙古侍衛親軍都指揮使額森呼  
圖克副之雲南四川兵若深所統皆隸節制師次巴陵

賊犯貴州急深敗績倍道赴之明年雲南又數告急議  
進止公謂蠻恃土產馬謂北馬不能險吾士馬既習其  
險易諳其變詐使賊不知為計不憂不捷次播州與四  
川汪帥兵合賊十萬且及境令諸軍畢入賊地分部攻  
擊蠻勢為沮時師行四千里天向暑糧且匱有旨須秋  
涼進發頓思播之境列營守禦申規約習戰射九日滇  
蜀軍二萬入烏蒙芒部公所統三萬及思播兵萬人與  
元帥哈喇遜額森呼圖克分三道進公從中道節制諸



軍賊所至為柵盛兵堅甲以拒公以客軍遠鬪非身先  
之無以作士氣崖逕斗絕即徒步雜士卒攀木而登遇  
其要害蕩滅無餘選射士列前發無不殪或設伏或縱  
擊奇謀間出出橐中白金為賞四十餘戰皆捷賊或降  
或匿且招且捕喻其酋以朝廷威德賊氣已竭以奇兵  
掩襲轉鬪千里抵雲南普安路境賊不復能軍癸卯二  
月己未析節就縛宋隆濟阿女等皆伏誅西南夷遂平  
召入朝將佐咸許上殿禮遇隆洽賜錦衣二襲玉帶一

金鞍勒弓矢楮幣二萬五千緡御史臺又奏公出私幣  
賞功酬勞銀一千九百一十四兩楮幣萬五千緡二佐  
偏裨遷賚有差上御嘉禧殿顧公曰平宋至今百戰必  
勝可謂奇才公奏曰非臣之力諸將之力也詔過家上  
塚鄉里榮之至武昌疾甚語問疾者曰昔當世皇榻前  
誓取交趾願死於陣不願效馬伏波裹尸還葬也折節  
之役今上嘗預令署狀約日平賊否則藉吾家吾幸了  
此不累子孫但恨不能取交趾以報世皇為終天之恨

爾歲乙巳二月乙未薨公生甲午壽七十有二贈推忠  
定遠効力功臣光祿大夫湖廣等處行中書省平章政  
事大司徒上柱國齊國公諡武宣先塋在遼東泰州普  
一路不知其世次矣公之考妣以至元己卯正月合葬  
於益都縣東北麻家營洱河之陽有翰林侍講學士閻  
復所撰碑公祔焉娶曹氏早卒繼李氏次姜氏王氏子  
三人曰托歡榮祿大夫四川平章也次某早卒次托出  
今叅政也女若干適某孫男若干女若干曾孫男女若

千至元初國家將囊括四海勝國岸然東南文恬武嬉  
勢不能不亡也及誘我叛臣繫我行人則其罪盈矣大  
聖御極順天應人大將一出江淮版圖固已在吾職方  
氏几上矣亦惟一時將帥之得人偏裨之用命際興王  
之運而各有樹立焉公以雄毅之姿奮身戎行其樹立  
亦茂矣哉天下甫定如大病始愈必有餘疾此才已而  
彼又見人或易之亦有能斃其身者江南之既平也閩  
中江西湖南黔中之諸盜廣東西之諸獠足以鼓動一

時魚肉吾民是雖餘疾非良醫未易治也公乃獨任其責或獮獶或招徠而威名所及莫不斂迹南北萬里始終百戰可謂多矣最後小人啟釁於承平之時敗軍亡將於小醜之手至糜爛汗漫不可枚舉矣而又以屬公公年七十矣乃能奮不顧身以刷國恥此又收功而尤偉者也其怏怏賁志以逝者獨有未取交趾爾是蓋有非人力之所能為者世以為公之恨而亦以為公之幸焉公之薨三十五年猺獠之發不知其幾朝廷議將每

難其人坐糜供億服未旋踵檄報又至則知公者其益可思也哉銘曰

金源澤竭望族俱堙逝矣東土孰弔厥屯薪傳不熄泉流有汙海岱鍾奇偉人奮出王師弔伐適逢其時結髮行陣死生以之萬山之役以寡勝衆雖穎既脫威名日重苦同在下勞為士先乘梯於雲拔杙於淵堅壁摧鐵飛舟趁空我惟不出出乃即功闕墻有警警於先聲茫茫青海沃壤可耕大風始息餘波猶蕩頑民弄兵有戮

有放五溪阻幽嶺嶠險邃虺蜮起伏亦恃其地僕僕掃  
除甫東又西有聞即行孰立畛畦伏波矍鑠自視未憊  
吾忘吾身馬革何待嗟嗟小人談笑開邊乃血我師俾  
流為川不有此翁揮戈白首西南之夷幾非我有天恩  
優渥下徧將士玉帶錦衣照耀桑梓歸來林下不煩綏  
復匪公之志亦公之福賸茲洱陽百世其昌我誌公功  
於戲不忘

至正集卷四十八



欽定四庫全書

至正集卷四十九

元 許有壬 撰

碑志

有元功臣曹南忠宣王祠堂碑

至正元年二月乙酉中書臣僚言敕建曹南王阿喇哈  
祠禮部議視淮安忠武王而祠於集慶縣官給其費且  
請賜田千畝以奉祭祀制曰可既月王之子托歡由中

書平章政事拜御史大夫行臺江南臺治集慶又得躬  
相厥役以迄於成貽書有壬曰子嘗承詔銘先王知先  
王莫如子祠落矣願有紀也讓不可乃本其狀擷其家  
世履歷勲庸之槩曰蒙古哈爾拉氏有贈定威佐運功  
臣光祿大夫司徒謚忠定諱博綽者王祖也贈宣忠靖  
遠佐運功臣金紫光祿大夫中書右丞相謚桓毅諱伊  
埒肯者王考也勲皆上柱國爵皆曹南王身皆死於戰  
有大功祖妣塔布妣摩哩皆封王夫人此其家世王沈

毅善戰襲桓毅職中統四年錫銀章虎節仍上萬戶至  
元十二年擢昭毅大將軍以上萬戶權行中書省事進  
中奉大夫行中書省叅知政事明年以叅知政事行江  
東道宣慰使明年入覲陞資善大夫行中書省左丞十  
六年進資德大夫行中書省右丞仍宣慰江東十八年  
入覲拜中書左丞相行中書省事階光祿大夫征日本  
次明州而薨壽四十九葬曹州濟陰縣郭邨累贈推誠  
宣力定遠佐運功臣太師開府儀同三司上柱國追封

曹南王謐忠宣此其履歷歲己未渡江破宋師於隆興  
北山中統初討阿勒達爾琿塔罕於河西明年扈征額  
瑯布格于幕北明年從宗王平李璫于濟南四役皆有  
奇功賜黃金金襴金鞍文錦恩數稠疊至元四年觀兵  
襄陽明年圍之越六年克之始走宋師安陽灘中綴宋  
師百丈山卒與策勲焉十一年略地江北奪郢州南門  
堡獻盪舟之策渡沙蕪取鄂州泝江陵至鎮江十二年  
與淮安忠武王右丞相巴延分道取宋王發建康道與

宋師戰屢敗之破東壩砦拔溧陽建平廣德西安長興  
闕獨松關前後斬首一萬五千級殺其將杜總管吳奉  
使許吳二總制及騎將二人俘谷總制張知府裨將祝  
亮等四十二人十三年三軍會於杭宋亡徇浙東降趙  
提刑等五百餘人追捕福安僵尸四十里殺步帥李世  
達俘秀王與擇監軍趙由懌防禦使林德降安撫使王  
吉分軍興化擒宋相陳文龍降宋官二百餘人淮兵三  
千人江南遂平此其勲庸配托端庫庫楞呼圖克台並

封王夫人子男二長伊蘇岱爾銀青榮祿大夫山東河北  
蒙古軍大都督集賢大學士次大夫也女五俱適望族  
有士惟古者功臣受封之國先建宗廟於路寢之東所  
以廣孝而勸忠也諸侯之制二昭二穆與太祖之廟而  
五太祖百世不遷昭穆則親盡而遞遷之自漢以來  
諸侯鮮及十世身享崇爵而子孫不能保也廟制由是  
而弗講矣其有德及生民功施社稷者在朝廷則有圖  
形以寓其思賢念功之意在其臣吏則有建祠以盡其

事亡如存之心亦因時制宜之義也諸葛武侯之沒所  
在求為立廟又請立之成都後主皆不聽民至私祭陌  
上以武侯之功尚何靳於一廟豈欲黜私祭以崇正祀  
邪夫所在立廟在禮若汎立之成都亦復不聽何哉至  
習隆向充之請始聽立廟沔陽則武侯之得廟亦戛戛  
乎其難哉皇上於忠宣既立之祠又錫之田思賢念功  
之盛德豈區區蜀禪之所知哉大夫祇順德意克篤前  
徽勸孝勸忠於是乎在皆可歌以薦者也乃為之詩俾

歌以徹豆遵其辭曰

乾元統天乘六龍宏才碩德如雲從忠宣天挺間世雄  
父菑子播昏作農帝曰來汝汝世忠奮戈無往不奏功  
方城額額睽皇風分兵犄角乘其墉沙蕪飛渡星月蒙  
順流霆擊無遺鋒義旗禮干趨獨松趙孤銜壁吳山空  
萬邦玉帛四海同台司兩轄昭報功虎符龍節行江東  
倭奴何物勞蒙衝魂升海隅心九重揚顯有子能始終  
哀榮典冊備且隆衮裳旒冕曹南封石頭城高江流潒



新廟奕奕摩蒼穹圭田千畝且鍾維縻維芑紛稂種  
春揄釋烝簋有饌醇醲載裸牲特豐備樂舞兮明禮容  
神保假兮福攸降象賢濟美垂無窮

大元贈光祿大夫江浙等處行中書省平章政事  
柱國追封趙國公阿勒坦哈雅公神道碑銘

江南行臺御史大夫阿爾斯蘭哈雅致政家居遣其子都  
水少監茂罕奉家乘請曰老夫賴先世餘澤竊祿位有  
年而吾父平章公墓尚未表非慢也願盛滿難居功名

鮮終恒懼不克負荷遺羞丘隴君恩如天幸賜骸骨養  
病田里年且八袞吾知免夫子知我其銘之有壬讓不  
獲本其狀序曰平章公諱阿勒坦哈雅輝和爾氏世為高昌  
望族祖伊嚕阿爾斯蘭多木達多木達華言巨室也贈中  
奉大夫河南江北等處行中書省叅知政事護軍范陽  
郡公祖妣伊特噶追封范陽郡夫人考諱哈喇阿爾斯蘭  
多木達當太祖皇帝肇造區宇國主伊都呼發兵攻金斬  
其長吏聞密實勒有異遣將命偕察喇四人馳告行在

且具款誠上曰果如爾言其告爾主以方物來對曰皇  
帝幸生活高昌高昌身且不敢有何有方物復命輦寶  
貨金織段以獻由是高昌內附因留宿衛從太祖南征  
卒於柳城贈資善大夫湖廣等處行中書省右丞上護  
軍范陽郡公妣雅克塔納追封范陽郡夫人公宿衛積勞  
除塔山屯田打捕提舉不就卒於京師昭回里第年七  
十一葬城西小南莊之原贈光祿大夫江浙等處行中  
書省平章政事柱國趙國公配巴爾呼塔噶封柳城郡

太夫人卒於濟南年八十四大夫時長憲山東護柩歸  
祔子男二長大夫也次賽音哈雅同僉宣徽院事早卒  
嗚呼世臣大家上有啓而下有承得以世濟其美者公  
一門其庶幾乎公性恂恂而志趨趨詣由近侍出官非  
其志也嘗曰我先人有大造於高昌民子孫必有興我  
不必爲也夫以右丞之賢明畏天之義一介往來舉危  
亡之國而措之安遇知太祖天苟引年居高位享厚祿  
必矣乃鬱而不發蓄而不泄至公又植而不食必再世

而後顯是蓋遲速之有時非人力之所能及而啓之於前者固已逢涌而不可遏公卒時大夫已拜南臺御史流澤之來浩乎其沛然矣其浮雲富貴優游以老宜哉大夫以卓越之才起家監縣為良吏入臺為材御史出廉諸道為剛明使者入中書分南臺為天子重臣歷九朝官二十七轉天下識與不識皆知其名而又躬服儉素衣無錦繡居無華飾榮寵方至退然若虛文皇嗣位聖眷益隆王帶上尊錫齋相望至為玉刻署押以示殊

遇當是時苟假寵於上為先世要美諡作豐碑亦何求  
不得顧乃自抑若不能加於其先有於其身者必遲回  
以待於致事又遲回以至於今日不請於上不謁於太  
常擇所宜為者自為之視世之朝暴貴而夕斃賜碑者  
有間矣二子長少監也次伊埒哈雅少監二子寶格寶  
山俱宿衛內廷公生世為賢子為賢父歿而享其寵嘉出  
於尋常身大官無聞者萬萬也其可銘也夫銘曰

於維趙國作德於逸而小心以繹不柔以忼不競以亟

以承其先烈以裕其胤息其先伊誰實為右丞子子其  
征屬屬其盈高昌之望曰命靡常主命不辱而天威肅  
將輦其金琬篚厥玄黃歸我聖皇以救寧一方大夫繩  
武有遠伊邇右丞有孫趙國有子坦坦如砥矯矯如矢  
維天子使靡不極所止宜爾錫爾山峙川委繫來世之  
祉城西之原有樹有封刻銘豐碑百世可宗

大元故翰林學士資善大夫知制誥同修國史贈  
推忠守正亮節功臣資政大夫河南江北等處行

中書省左丞上護軍追封魏郡公諡文肅暢公神  
道碑銘

泰定丙寅翰林學士資善大夫知制誥同修國史暢公  
堯十年矣制贈資政大夫河南江北等處行中書省左  
丞上護軍追封魏郡公諡文肅又十年加贈推忠守正  
亮節功臣官勲如故伯子江東道廉訪副使篤將侈君  
之賜灼公之善範後之承也諡其友許有壬叙而銘之  
碑叙曰公諱師文字純甫上世居汴公生洛陽大父淵



贈中順大夫上騎都尉魏郡伯配田氏贈魏郡太君  
父訥參汴侯幕一府服其賢注地里指掌圖有詩名  
公幼警悟貧無書手抄口誦甫十五博覽經史弱冠  
謁魯齋許先生先生賓遇之高弟若姚公端甫高公  
道凝皆相推友善中原底定慨然有志於世上時政  
十六策受知丞相安圖補右三部令史丞相巴延南  
征選為省掾從攻揚州常州下蘇秀臨安歸裝獨載  
書籍無一長物編平宋實跡上之初官承事郎行樞

院都事重慶叛竭謀畫諾諸城相率內附安西王承制改四川北道宣慰司經歷尋除承直郎潼川路治中拔寒畯王朝綱王伯寧韓伯昌為府史後皆至達官修府治發地得白金五十錠同僚分公十錠公獨不受以修廟學傳舍餘作酒器給公用承制改同知保寧路事治尚平簡反側以安擢僉四川道提刑按察司事世皇知其賢詔所至毋敢沮撓給三傳赴上至則摘姦雪寃興學除弊風米一變有旨若曰暢純甫不

貪佳士也其令與臺臣伊蘇特穆爾為侶遂拜監察御史糾劾權貴憲綱肅然上所纂農書遷陝西漢中道巡行勸農副使置義倉教栽植闢荒田農事以興俄僉陝西道按察司事時按察改廉訪司精汰舊官獨副使盧公處道暨公仍舊興元監軍怙勢肆虐得其賊奏決之移僉山南道枝江歲防水役衆往返四百里供給尤苦公以江水安流悉罷其役伊德呼駙馬之徒大為民害繩其尤者流之改僉山東道入為國

子司業教育有規諸生服焉除陝西行省理問始至決  
滯訟三百餘事若右丞圖們忒爾之訟家財宣使輩士  
安之華折民齒開成同知張德昭之利女財而奪之歸  
皆强悍有恃官不能制者併置於法引疾歸遷太常少  
卿轉翰林侍讀學士知制誥同修國史成宗賓天武宗  
撫軍朔方仁宗淵潛覃懷而中宮屬意安西宰相知其  
不可乃集館閣議以察向背公與焉即颺言曰此宗社  
重事詎宜苟且衆皆默然又曰余病矣請歸調治遂拂

衣而起仁宗入京始出視事草至大改元詔修成宗實錄賜中統褚幣為錠一百加少中大夫請郡除太平路總管兼勸農事歲旱當禱公曰間先旱必哀於民天可欺乎乃捐俸致禱不日沾足當塗民坐殺牛祈雨囚械者六十餘人公惻然曰雨暘愆期守令責也民殺牛致雨爾縱不愧於心尚忍聽其訟乎即破械出之舟有沂流觸汭流之舟致溺其人累獻不能決公亦縱之吏持不可上其議憲司卒是公議秩米收積盈屋公曰吾家

人能盡此乎呼寒士小民恣其取去分憲至郡必謁公  
曰公治內無事此來行故事爾至屬邑曰暢先生治內  
何敢久留後守為之立祠於學召為翰林侍讀學士階  
中奉大夫奉勅撰王勅成道記序等文賜白金兩錠不  
受尋除燕南河北道肅政廉訪使視事五月歸中書遣  
編修官富珠哩朮奉翰林學士之命以請趕至汴以疾  
歸延佑四年丁巳秋主河南鄉試歸次襄縣西顧長安  
發丘壟之歎因感疾十月朔薨於縣之傳舍某年某月

某日葬於襄陽峴山之原配伊喇氏上世遼貴族佩金  
虎符萬戶某之女先公二十年卒兩封魏郡夫人三子  
長堆音廕淮安路判官轉將作院經歷拜西臺御史移  
南臺陞都事除江浙省員外郎改僉山東道廉訪司事  
入為監察御史階太中大夫為今官娶李氏子六人勉  
國子上舍生年二十七卒勤勛勛勁皆幼女五人次  
曰騫不仕娶成氏子勛女一人次曰駿娶蒙古氏子四  
人最勛助勝篤駿魏郡夫人生騫曹氏出也至元之初

際興王之運得賢為盛而文學之士措諸有政拔出流俗籍甚在世若魏公者混一來可數也公制行孤潔足以俯視一世立志高遠足以上追古人天下之人莫不驚嘆以為異人而不知者造訕騰議公亦不恤也若夫從南征而垂索歸得地藏而用諸官屢辭上賜盡揮祿入雖公小節而其胥次為何如哉高公彥敬為山南副使移文言不可居公上者三謂公官五品先十餘年不可犯積薪之誚渡江孰不富貴至今家僅數口寒士無



異勢利無一動其心高節清風殆不可及且兄事三十年義雖朋友愛如同生一旦岸然其上實不自安犯此三不義何以糾人之非即日辭去觀此則當時俗化之美士大夫風節之高公之所以致此者可知已朝為侍吏暮徵倖躡數級傲然為長吏為同列者聞二公之風亦可少愧哉公作守得古循吏體執憲有古遺直風至於立朝抗論不恤利害則其較著者也其為學宜專館閣備顧問而中外十轉始為國子司業又出為陝西理

問入翰林才一轉官尋又出守再除翰林則老矣豈一時人才之多邪抑當時名爵之重雖如公者亦若是而已邪一技一能與不能操觚而專局至通貴未止者則又有命也邪然而列聖知過多士推服太史有錄太常有諡加贈有號而又承家有子則天之於公亦厚矣讀書一過目即不忘假友人宋長編不決曰反之友訝其易公曰予舊熟之有忘者申之爾友記僻事數十驗之應答如響為文力追古作盧公處道以為似太史公而

姚公端甫亦稱純甫實善文著述多而不存藁副使所粹才十一爾其見於世者不專於文也銘曰

魏公之出際時淳興挾策見世淵儲遂騰宋木斯拔蜀蔓有芳簡牘既資贊益惟弘陶之不撤撫之不輟以隄厥潰以撤厥弼璧求簡編土視金繒皇皇使車爰七其乘善則爾揚愆乃爾繩學政聿修郡績載凝掌帝之制適天之夢大議不屈長江可溯名日山重家不縷增歸來自樂飲水曲肱有介如石有潔如冰峻如絕壁孤如

秋鷹弛張翫世中別涵澠夷考其行不渝九微聞公之  
風貪懦自懲宰木已拱恩光日昇漢江茫洋峴首峻嶒  
元凱多事慮及谷陵惟德惟神有懔威稜景而前修昌  
而後承登世于千物莫我敢較

至正集卷四十九

欽定四庫全書

至正集卷五十

元 許有壬 撰

碑志

河間路重修孔子廟碑

化民以學校承流以牧守治道之要者也四代庠有上下序有東西學有左右東膠虞庠之制雖質文家之不同所以明人倫為民極其義一也聖人得位而行其道

於天下也則亦以是諄諄語人為千萬世之計焉後之人若不以師道自任而任於人任於人而近民者其唯良二千石乎古有之二千石千里之師職在宣美風俗夫宣美風俗舍學校何以哉而所為師者猶師之教弟子循循善誘化其質而發其善不務出是而惟獄訟榜笞是務是為師而讐其弟子可乎昔蜀有夷風文翁修起學官由是大化閩未知學常衮設鄉校風俗一變夫以蜀閩之陋而二公一至翕然丕變況內郡熟先王詩

書禮樂之化者乎河間古冀州之域今為甸服大郡總  
管非敷歷焯於時者不輕畀至元六年庚辰實皇上復  
科舉之歲戶部侍郎萬嘉閭出守是郡丁文風中微之  
餘士氣萎蕩弦誦絕響慨然欲振起之相舊孔子廟殿  
宇卑陋配侑無所於設且堂構百年摧圯不支將撤而  
新之而施設有序明年為至正辛巳監郡塔布岱來起  
家冑館右文其素也故其議克協剡其事以請朝廷從  
之仍給楮幣若干俟復倡割其俸以佐不給僚屬和者

相屬緡合二萬五千有奇或以歲饑請緩侯曰食可去  
聖教不可一日廢況民食方棘而興作以資末技亦昔  
賢救荒之一道也於是市材庇徒傭直有加盛暑躬莅  
厥役吏抱牘就咨郡事口酬手署不少怠再踰月而落  
馬崇加一仞廣視舊增三之二黝堊丹碧不質不華配  
設有容左右扶扶翼以兩廡繚以周垣崇巖靚深妥侑  
惟稱又為精舍以處師生時課其業諸生相與謀曰完  
矣美矣微侯廟其圮矣貞石之紀其可已矣乎走狀屬



記辭不獲則語之曰夫子所謂聖人不得位而不能行其道於天下者也不能行其道於一時而能行其道於千萬世者也尊為天子富有四海宜享宗廟萬世之祀堯之藝祖舜之神宗文武之世室求之禹跡芒芒之中邈乎其不可考也其或廟以某地祠以某時官無常規禮雜不經吾夫子家而闕里國而胄監散而天下郡邑象設有宮藏事有時蓋其立教之功人報之隆與天地相為無窮我朝列聖致崇極之禮視古有加恪遵垂訓

設學重教皇上方圖治儒術作新士氣宜侯之疲力祇承而不敢緩也新廟奕奕諸生在庭亦有感發而興起者乎聖賢之道具在方冊口誦心維身體力行勿怵於近利勿安於小成窮而獨善人且薰其德達而兼善天下受其賜使世之人指而稱之曰某河間士某河間士是侯之望於諸生者也諸生其忍蜀閩之不若耶嗚呼侯豈自鳴其功者哉春秋書興作重民力僖公修泮宮常事不書然泮水之頌夫子乃存而弗刪豈無意乎則

是役也不記焉不可也於是乎書

故承務郎江西等處儒學副提舉葉先生墓碑

承務郎江西等處儒學副提舉致仕葉先生諱瑞字宗  
瑞遠祖祖洽宋熙寧間廷對魁天下曾孫廷秀由邵武  
徙建昌新城春秋擢第官至朝請大夫知梧州言事忤  
旨仰藥卒子遠宣教郎奉樞歸次采石而溺孫茂祖甫  
四歲母饒夫人抱以依姑趙趙居而教育之因為金溪  
人中鄉貢進士舉娶趙生四子先生其叔子也幼尚氣

節致力經學以及百家皆得旨要其為舉子業不蹈時  
習或戒以希有司旨先生曰吾為是區區而悖吾師說  
乎益篤志為己之學進士公卒先生甫冠賢產悉分弟  
妹而躬耕以食趙夫人卒兄弟四出先生獨力營泊久  
乃幡然曰昔親在不敢離親亡矣充吾學為揚顯者不  
力可乎歷甌越會稽瑯琊涉汶泗過潞入秦道晉以達  
幽朔無所遇最後至遼東世臣洪氏以好儒聞聞義學  
方難其師有以先生文行言於平章君祥右丞重喜者

及見大悅館而師焉諸子彬彬以文學濟其世美遼東  
之人翕然知向學者先生力也朝廷以右丞薦授遼陽  
路儒學教授再調大寧路陞將仕郎江州路湖口縣主  
簿攝尉事盜久逸者皆獲之憲司檄按德化縣疑獄即  
得其情覈虛糧決滯訟縣以治聞轉撫州樂安務提領  
俄請老授前官至順二年十一月二十五日以疾終於  
家壽八十有五某年某月某日葬某處娶趙氏生子順  
女適孔景仲繼黃氏生子升寧都州夏河寨巡檢女適

湖口縣典史杜復亨繼王氏生子大有廕宜春揚橋務  
提領女適高安白沙寨巡檢孫鐵柱孫男三人緝綱繹  
女三人先生年五十始出卒能致官而行其學迹徧海  
內乃得返鄉里至於休致而終於正寢雖用不盡其施  
而教之振於東善之淑於人者多矣遺文四十卷庸學  
提要六卷周易釋疑十卷於戲博矣哉中原貢舉廢將  
九十年江南亦四十年有士少時先公教之曰金源分  
裂不事貢舉國家之大未有不行但遲速有時爾力學

以俟當有際也時混一才二十年故老尚多幸及從學  
粗有得也尋以校職從事山北憲貢舉詔下乃弃而應  
薦先生實主文遼陽科制廢久內地有所不悉遼陽在  
東僻有司一切昧於奉行先生纖悉教之蓋江南內附  
時年已三十餘矣習於場屋條制者也監試憲僉田時  
佐曰微先生幾不能奉詔有壬既獲薦又入禮部經問  
之與策問之切見者莫不駭異先生在湖口方鳴金鼓  
行江有壬歸省臨江過之中流歡甚至順庚午有壬為

兩淮轉運使先生惠然肯來年八十四矣飲食起居猶昔也手書大學中庸二書注字如蠅頭以與小兒留月餘歸明年遂沒又八年升來武昌請銘將刻之阡茲銘也其誰宜為銘曰

於戲先生志一學醇友善行道恥為鄉人昔隘分裂佔畢苟安四海既一我轍乃環有韞未暴費用不售爾不我知我不爾覲晚慕幼安片帆遼東有命自天皋比畀公俊造賓興墜緒孰繹紹遠選公張此東僻樂育嘉惠



侏離伊吾糾邑司征昌究我書八十五年口不藥劑裊  
身所遺根茂實遂旅無所容道路屏營歸來正首於戲  
先生

故奉直大夫僉河北河南道肅政廉訪司事贈朝  
列大夫秘書少監騎都尉高陽郡伯韓公神道碑  
銘并序

公諱居仁字從義姓韓氏般陽長山人曾祖而上兵亂  
譜逸祖諱溫配段氏考諱國寶配劉氏三子居真居中

季公也幼耿介年且強仕郡守移刺曰舉孝廉二千石  
事吾封部有人敢默不聞貢之司憲緱山陳先生長憲  
山東熟公為人禮致之行部必以從轉察院吏部益自  
砥礪大德間朝廷勵精圖治慮澤不下流而情不上達  
也遣奉使宣撫天下故翰林學士承旨中庵劉公分遼  
陽嶺北擇掾尤慎而公在選竣事多不職獨遼陽最他  
道陞御史臺掾轉中書右曹臺銓必流內官嘗試者掾  
屬他轉未出官不與公起家除山北遼東道肅政廉訪

司經歷山北地近法不給傳公名貧苦特給之遼東控  
歲絡萬里事簡而重同官不慎者動輒齟齬裁其銳鼓  
其懦和而屈之事以平允遷刑部主事時揚州總管兩  
淮運使構獄二人號囂訟朝議擇才而健者鞠之公承  
詔偕省臺官行至即屈伏徵贓餘十五萬緡還拜監察  
御史賑濟南饑吏不得作姦民實被惠改樞密都事尋  
僉河南道肅政廉訪司事按部衛輝推官者誣平準官  
劉紫伯歐詈因擊萬歲牌破墜入以不敬械獄中公明

其枉釋之蒙古軍劉呼圖克忒爾爭畔折人兩脛醉縛舅氏截其一耳聚徒黨縱射獵毒里閑官不能禁督執之正其罪閭鄉郭女已妻李里豪馬賂其族誣先有約官將奪之公至而明葉縣民王女約嫁張歲歎欲渝約女誓死靡他召二族諭以禮致期歸之按行至均州以疾卒於官舍延祐七年七月四日也積階自承直郎至奉直大夫得年六十有四平生之官不挈家為易退計捐館日惟子希范在側希孟奔赴奉柩歸以是年九月丁

酉葬僊家里先塋配郭氏淑而能家公宦游祿僅自給  
夫人躬蠶督耕家以溫飫子四人希孟中書掾及格歷  
工部主事都功德使司都事中書省檢校皆有聲拜監  
察御史階第四品贈公朝列大夫秘書少監騎都尉高  
陽郡伯夫人封長山縣太君進高陽郡太君希夷廕新  
城尉今剡平主簿法當廕長子孫希孟讓也希曾肇州  
儒學正希范未仕女三人適張劉李皆士族孫男四人  
長克勤餘未名女四人長適段氏餘尚幼皇慶壬子有

士以教官辟山北公寔長幕退食講誦休期登覽一日  
不相釋嘗曰子朱雲誰敢相吏公監廷試有士登前列  
喜若已得沒十七年希孟具行實請銘嗚呼有士尚忍  
銘公也夫而忍不銘公也夫士修己治人不患學之不  
博而患行之不逮也不患政之不達而患守之不勵也  
昔緱山明經為政終始不悖高風勁節特立一時浮華  
違實依阿進熟雖累百於世世亦何望哉公始從緱山  
有餘力則講習問難卷帙不去手老亦不倦所造日深

故觸事洞然蓋有得也為人寬厚礪以廉恪自為吏危  
言直聲在人聽訟莅事恂恂開諭而恐人之納於過也  
風紀狃習微罷號能一建於臬枉直俱困公惟良惟情  
濟以哀矜謗譴騰鼓不恤也故能矯狃習之弊而直人  
之枉有古良吏之風焉至於風節毅然終始不悖其善  
學緱山者乎銘曰

繫士為學匪博而華蓋擷其實而刊其葩世方一軌狂  
奔景從我日斯邁惟理是同蚩蚩之氓諄諄之惠惠文

東濕寧獨不愧稂莠斯拔嘉苗培之威豈爾仇恩豈爾  
私按部有方斂此德惠胡不完用俾大而沛輶車煌煌  
遽易以轡良心感觸誰不涕泗先塋既妥餘慶無畔表  
世益章用勗鄙懦

故朝列大夫同知京畿都漕運司事王公神道碑

銘

并序

公諱述字繼先姓王氏世居順州高祖同善生殖金李  
賢饒一鄉雅不飲酒壽日人強之為釀得疾語其子慶常



曰吾已上四世皆一子吾又一爾家財雖數世用且不  
匱所懼者子孫單弱爾吾聞惠澤可以徼福人貸於我  
者其貸書盈篋爾於吾前燒之明日卒慶常監順州東  
門歸聖朝為懷遠大將軍僉順州安撫司事三子瑜瑞  
琪瑜始徙燕四子天永天祐天祿天澤天祐封奉訓大  
夫大都路順州知州飛騎尉昌平縣男贈中順大夫禮  
部侍郎上騎都尉太原郡伯配馮氏追封昌平縣君進  
太原郡君三子長恭孝弟善治生幼成早卒次公也幼

自振厲宿衛隆福宮積勞除利用監資用庫提點轉通  
政院判官中都留守司經歷同僉通政院事院罷改萬  
億騎源副提舉京畿運糧提舉禮部服闋起為大都路  
判官擢同知京畿都漕運司事積階朝列大夫至順辛  
未十一月四日卒疾革召姻族暨凡交游貧者散金有  
差得年五十八祔宛平池水原先塋配朱氏繼妯氏封  
閼

太原郡君男六十九年十二公生長京

國不汲汲於進起家五品迄捐館才四品嘗曰子所以

仕急養志耳封澤及親足矣又曰予筮仕來四時九族  
舉在目前惟扈從北至上京繼仕中都南未嘗過盧溝  
不知人間有羈旅憂天地間幸人也所得既多故取官  
不敢復多取不負官而已占籍京驛為通政不私其宗  
中都始城大臣長溜鑰首擢長幕一時巡幸供擬至沓  
剗割閒雅騎源出納鉅萬同僚嫉其潔欲誣構不能汙  
也京府實父母邦行所無事親若疎舉無怨言始終尤  
轉皆以能稱交游多儒生禮法是咨悼世次之湮沒請

於清河元公作家譜知源流之所自多而不亂遠而有  
指馬構亭蓄書畫古玩器賓至具有酒必盡歡有士為  
冷掾中都公實推轂謝之則曰子他日陶鑄我者也公  
之調後幸與馬承乏叅議中書公已病有壬憂去而公  
遂不起俎夫人遣女奴挈其孤請曰同知將屬纊猶念  
念問公孤未有知未亡人聞諸族老不沒惟銘知同知  
者莫公若也嗚呼有壬誠知公者也公之善非一其大  
則孔子所謂好禮老子所謂知止者公有之矣惟其有

則有士之銘之也可無愧矣銘曰

千金比都鮮克自持矧家於京紛華蕩馳折節恭儉服膺訓彛不有定力孰堅不隳人亦有宦道途駸駸東帶立朝至於橫金不出國門族華以散養恬一室左書右琴大賙親朋談笑而逝念我睽離垂絕不置今我來思故人星霜過里懷舊云胡不傷禦務多賢族無急難永利爾孤公其益安

至正集卷五十

欽定四庫全書

至正集卷五十一

元 許有壬 撰

碑志

贈中大夫僉太常禮儀院事輕車都尉追封樂安

郡侯諡惠肅孫公神道碑銘

并序

河東山西道宣慰使高唐孫公致仕家居年七十七矣  
其子亞中大夫江北淮東道肅政廉訪副使天正卒於

官既葬有司上其行實請易名於朝宣慰公走書屬有  
壬曰我族蕃衍而我惟一子我幸健俾仕四方雖不在  
側志樂也今則我當死不死吾兒不當死而死矣情之  
所鍾殆無以自釋獨有可以垂之不朽者得所托焉吾  
其遂可少釋乎吾兒昔與子游子其銘之按孫氏其先  
益都壽光人諱嗣翁者金末成襄鄧遂居洛卒因葬焉  
配張氏生德遷高唐生殖日盛徙洛葬高唐故又為高  
唐人配胡氏生居仁宣慰公也起家新昌丞平大盜知



名踐歷華要階中奉大夫累贈嗣翁嘉議大夫濟南路  
總管上輕車都尉樂安郡侯張氏樂安郡夫人德中奉  
大夫山東東西道宣慰使護軍樂安郡公胡氏樂安郡  
夫人天正字夢符妣宮氏贈樂安郡夫人繼母蘭氏封  
樂安郡夫人始生宣慰公兩夢神人授白麻丈曰宣付  
孫天正因名焉為人狀貌奇偉嗜學穎悟宿衛於仁廟潛  
邸大德丁未立東宮僚屬擢從仕郎受文庫副使選  
補太史掾監修國史掾除中書省管勾承發架閣庫宣

尉公為右司郎中例避改都護府都事蘭夫人卒河東  
泣血奔赴毀瘠骨立護柩歸葬廬於墓側服除知沂州  
三皇廟湫隘至三日命改作民吏難之既而規置有法  
不三月而訖功臨沂縣去州遠吏得延緩為姦徙之州  
左捐俸倡率以賑歲饑立法均役以革吏弊墾闢荒田  
招集流亡朔望率校官諸生講誦廣社師以教都鄙季  
月舉孝弟力田怠惰游食各一人春秋行縣躬覈之臨  
沂民妻徐甫二十喪夫自經以徇有司四年不以聞得

其實上之報下旌其閭嶧州豪曹誼奪細民田凡三移  
不為直郡以屬公立決之既去州人刻石思之去五年  
益思之又相與請文刻石改遼陽省左右司員外郎敬  
歷治效灼不可掩於是臺除僉山北遼東道肅政廉訪  
司事廣寧劉大使誣承殺人辨而釋之人稱為神明俄  
拜監察御史劾權近斥竄之文宗嘉其直每進見字而  
不名擢江北淮東道肅政廉訪副使行部多縱弛犯科  
將大懲之而一疾竟不起至順四年二月二十七日也

得年五十以某年月日祔先塋元統三年春贈中大夫  
僉太常禮儀院事輕車都尉追封樂安郡侯諡惠肅配  
劉氏贈恭人繼張氏贈高唐縣君今夫人董氏封高唐  
縣君二子曰琮曰璋一女尚幼嗚呼予悲夫天之生材  
成之難而毀之易也又悲夫子不得銘其父而父廼銘  
其子也孫氏三世同居而惠肅又能睦於族孝於親出  
為良牧守入為才御史宣慰公之樂世無有也惠肅嘗  
欲叙次宣慰公行實未果而在其身者一旦反以累之

以垂老之人罹茲荼毒其可傷也夫雖然得之天者吾  
不得而必之修之身者苟無愧焉則期願不為多而五  
十不為少是盖有幸不幸焉君子不校也銘曰

孫源導洛實猶濫觴浚而擴之滙於高唐至河東公日  
底昌大惠肅承之舉以沃溉惠肅之生天兆其祥受知  
仁皇受文為郎二十七年於中於外雙碑植沂百世遺  
愛驄馬載驅豸冠復我清濁自彼吾其靡他茫茫淮甸  
荊棘塞之我銍始揮云胡折之易名以諡隱卒以封施

用未究子孫其逢哀哀老親遽委而去存沒無愧修短有數於昭斯銘貽訓將來父兮子兮是亦可哀

故忠翊校尉廣海鹽課司提舉贈奉訓大夫飛騎

尉漁陽縣男于闐公碑銘

先子佐永州幕祁陽監縣于闐公實同時其子赫伯舍登乙卯進士第有壬寔同年同仕於臺又同儔于鄂一日請曰赫伯舍不幸早孤先人功烈幾泯矣幸及故老十得一二而墓碑未刻子其銘有壬惟世交義不敢辭

公諱喇嘛丹以字噶瑪拉丹行于闐人也于闐自漢通  
中國至公始為氏焉祖諱鄂爾伯什斯巴薩哈見為諾  
爾罕牧民官父諱穆爾阿里大名宣課提領至元十三  
年宋平擇守令大臣以公見世皇稱曰巴圖宜邊境用  
命監永州祁陽縣縣接蜀廣多溪洞頑梗所穴稍失御  
即跳梁攝尹土豪羅飛素橫常有功守將劉匿不上十  
四年遂弄兵襲劉嘯衆至十萬公間道赴州遇賊四至  
射刃七人馳出從者數十人獨周保持馬尾免守州

南門賊攻北門敗之獲其佐周遷三十人飛環而攻我  
既却守將追之公偵知有伏約礮發夾擊俘戮殆盡擒  
陳瑞於木皮寨賊起五月參政呼圖克特穆爾始至公率  
先深入繼以大兵獲飛戮之實其皮以徇賊所署令簿  
尉以次授首主帥將屠縣力爭得免命招撫得戶一萬  
三千出石空步匿岩穴將死者四百餘人十九年飛黨  
黃如瑞稱宋年據縣西躬入降之得戶一百四十初飛  
欲害公公已入郡如瑞殺公假弟納蘇拉迪音妙壻堪布



及降不校也四望山界四郡林谷阻深二十二年賊賀  
九六盤穴其中四省兵討之公焚山堙溪身為前導詹  
一子據黃羅嶺作亂兵將因欲屠之公曰脅從且免矧  
良民乎我其長也當先即刑主帥許生致渠魁當免乃  
赤手步入賊始未信刃槩以逐公徐進無懼色鋒礙面  
尋閣兩肩公曰我以身保汝出即兵解不信留我以質  
賊投兵羅拜曰天活我也留從者唐正以其魁出師遂  
還建議也種鳥符大水戍低城大橋排山息饋輸鎮險

惡從之湖廣省臣貪虐意公竒貨下獄幾殆既縱復攝  
邑父老爭餞飾小兒歌聲公之寃省臣誅遂已公以黃  
巖嶺極高險當驛衝暑行尤困作粥食過者自夏迄秋  
歲不輟主帥憲臬屢上功輒寢調廣海鹽課提舉大德  
元年三月二十日卒桂州年五十有九治命葬祁陽北  
原娶伊爾根氏先卒繼蔣氏賢而讀書事公姊如姑討  
賀之役陰遣勇士張甲率五十人給兵以從後公十年  
卒二子沙海布迪音出周氏蔭道州行用庫使赫伯舍出

龍氏四歲失母蔣氏子之爲御史贈公飛騎尉漁陽縣  
男蔣氏龍氏皆漁陽縣君僉浙西憲移湖北階朝散大  
夫公身長八尺餘勇而有謀蹈危不懼爲縣十八年人  
號長者撫而活者戶萬三千六百四十爲鄉民長子孫  
可勝計哉然壽不六十位才五品爾僉憲按黔中當蜀  
有警諭土酋止還卒招鄉兵同變守險號令精明人謂  
有父風焉諸孫種學日大以蕃嗚呼天道之有知者固  
自若也其有功邑民家能道之戰陳之詳則遺老無幾

僉憲自浙歸及見張甲暨老兵鄧義輩得事為詳又尋  
病沒甲亦老矣豈非功烈之在世天實不欲滅之而使僉  
憲及聞也不愈於有善而弗知知而弗傳者乎銘曰

惟天生才惟才用殊才可太受而用或拘為邑孔卑游  
刃有餘頑獷鴟張我長乃撫弦歌未洽戈戟若林捍患  
禦菑我力我心嗟嗟赤子亂豈性常獸驚波傾乃底滅  
亡免胄撓鋒赤手搏虎彼心亦人其忍予悔誠感機應  
厥角若崩萬命嗷嗷垂死復生于屯于戍于田于耕十

有八年惠浹政成降年不永有繇未究豈晉於身以大  
厥後民子而孫何日忘之我不公忘公無我遺

故僉書江西等處行樞密院事贈樞密副使護軍

雲中郡成毅公神道碑銘

并序

仁皇御極勅太史傳功臣罔俾湮滅復下令訪索遺逸  
家許自陳遼州達嚕噶齊額森特穆爾上其父僉書公  
行實且請易名於朝致和九年贈鎮國上將軍樞密副  
使護軍追封雲中郡公諡成毅妣欽察氏楊氏皆從封

雲中郡夫人乃詣有主請銘請碑謹按太常之議而筆之曰公諱伊德默色杜爾伯特氏父諱台世役宿衛世皇徇鄂公以驍勇扈行有警必前賜白金綵段名以拔空攝阡事征李璫以勞入侍上嘗陰視諸衛士腰帶見公所佩精備命佩刀糾諸士息州將請督戰官宥密臣枚舉不允賜公虎符海月符金鞍玉帶以行宋戒嚴金剛臺衄其鋒戰捐箕窩中流矢墮馬易騎復進大破之所向克捷遣子納琳請城浮光召入面畫可之賜金鞍

一授昭勇大將軍光州等處招討使光既城總十二萬  
戶攻陽羅堡分鎮黃州立驛抵汴徙潯陽以扼江西下  
南康瑞昌德安分攻洪州章江門不克呼敵諭名將親  
登城敵請入約降日公自往譙其久抗王師其守列槃  
曰大江已失此堅閉畏罪爾明文示宥當即解甲為請  
於帥如約受降撫州援至敗之土坊遂入撫并下建昌  
撫賊張青阻險莫制偵知賊娶賜宴所居夜趨七十里  
破其柵獲青俘其族脅從輩悉縱之樂安詭降既入兵

亂出窗戶退則斃几填塞里巷前却創甚竟獲其首崇  
仁宜黃皆降偕它帥分道取閩約集建寧所至如破竹  
三日約兵始至黃人叛公方赴贛帥府以公舊鎮威名  
素著俾總江西兵往討復之麾下無敢縱掠民感德為  
生祠初湖廣兵屯樊口公言形勢不利其將鄭不聽果  
為賊劫溺死公之入也得其虎符賊中奏報還鎮國上  
將軍廣東道宣慰使進輔國上將軍江西省叅知政事  
同官誣構左遷昭勇大將軍招討使入見自明賜給豐



興校隸賞擢有差為罷行省改鎮國上將軍江西道宣  
慰使以直前枉移叅閩省尋復江西往來閩廣平邵武  
取漳州潮陽番禺下汀梅循惠分寧董奇樂安貴早小  
洲黎德弄兵蜂起悉敗獲之上欲立行樞密院徵天下  
省一官入議公對稱旨遂僉書江西等處行院事院革  
入朝上深撫慰議以名城休老會疾作不起至元二十  
四年三月二十日也春秋七十葬定陶鐵渠原子六曰  
拜特穆爾後衛親軍千戶曰奇爾濟蘇特穆爾曰納琳

襲公舊部明威將軍萬戶達嚕噶齊鎮建昌曰囊嘉特  
能左右騎射曰額森特穆爾始監解州移遼州改同知  
咸平府事封奉議大夫曰布格蔭昭信校尉同知江陰  
州事饒州路判官孫闕人公為人持重性尤敏悟

譯傳剖決纖悉曲當有壬倖遼熟監州言先烈南臺行  
部過庾嶺居人往往能道公事雖驛郵移置靡不有法  
昔宋不綱我師之南也曲長偏校皆將帥才況佐元氣  
而握元機者乎公早以才器受知世皇謀濟其勇樹勲

赫然其生而顯榮沒而崇異宜哉銘曰

皇元繼天盛德朔基維春始艮動闢以時淳渾鍾才景  
從輩出有若成毅桓桓惟勗賚恩匪私曰能是任拔出  
偏裨簡在帝心帝曰往哉息師汝監裹創摧敵城光蔽  
南郡邑望風降畏不先何獨彼洪孤壘岸然我戰爾知  
我名爾熟汙凝睨消顛危命續黃人鼓疑渠魁乃殲畝  
棲不驚廟祀孔嚴伊閩與越指期蕩攘紛紛螳怒輒敢  
臂當于蕃于宣功浮厥位原抵深茂流長實遂播美有

史隱卒有章我詩既同百世其昌

贈嘉議大夫濟南路總管上輕車都尉追封博郡

侯鄂通公神道碑

并序

惟鄂通公在女真為貴族世居遼東天朝混一立賢無  
方敬歷華貴者接武中外廣西道廉訪使呼圖魯既位  
通顯制贈其祖鳳住亞中大夫東昌路總管輕車都尉  
博平郡侯父高山嘉議大夫濟南路總管上輕車都尉  
博平郡侯祖妣舒穆魯氏妣二王氏皆博平郡夫人乃出

其家乘請銘諸碑按濟南公高祖呼沙呼金兵馬統制  
都元帥以功封澤王戰歿曾祖呼嚕內外點檢權樞密  
院祖薩哈鎮國上將軍京西等處兵馬都元帥考即為  
東昌公襲其世官穆昆從宣宗遷汴壽八十一卒三子  
公以長襲穆昆義宗播蔡邑行察平僑東平主帥錄其  
世時其衣廩東昌給地五千畝宅而居之承制除高唐  
知州東平控郡邑五十四金谷戶口勢不可理檄公稽  
糾宿弊一洗為州有惠政歲丙辰卒官年五十有三葬

聊城之柏林娶王氏先卒繼王氏子六人曰納丹珠山東  
道統軍司知事曰瑞童曰慶童曰安童曰文敬曰武畧  
將軍同知漢陽府事致仕曰呼圖克婁起家衡山縣達  
魯噶齊轉臨桂興安尹治最拜西臺御史移南臺歷簽副  
凡六道廣西言岑雄無叛逆制為寢兵而雄竟招出朔  
北辨死獄杜宗起二人寃江西折分寧若磴之害舟楫  
者十所溯西賑糧虛十萬石民吏雖壞產莫償為盡釋  
之彰瘡罷行覆蹟屢最擢佩虎符廣西宣慰司同知副

都元帥改本道廉訪使一年棄歸中道有旨若曰鄂通  
為得人縱年高衆不為例其勿致仕賜金段二陞正  
議大夫而明哲知止去志浩然矣子托克托蔭承事郎同  
知常德路龍陽州事孫男曹女若干人嗚呼盛哉昔金  
源氏奮起東北奄有中夏亡且百年世無其史故家遺  
俗存復無幾稗書間見非龐失真則闕不彰好古之士  
慨焉公之先由統制而下世繼樞要其豐功偉績計必  
炫耀一代史之所錄不得而知之公再啟厥家至廉使

又能推恩九泉表揭世次其所以揚天休播先美者不  
在於茲乎銘曰

宋綱解紐金職夏盟苗勃水沛孰遄厥成曰惟景從扞  
禦輔藥云胡百年寥闕莫稱懷襄胥溺有子維禎自天  
迓續顛木斯萌錫田啟家分牧著能嗟彼文獻吾猶及  
徵混混其源翼翼其承於粲繡衣脫節益貞顯隆敢專  
及先乃榮大哉亭毒逝者猶生百世川至繁祉是膺勉  
旃繼序監此刻銘





至正集卷五十一